

Ayera tabata Dia Internacional di Mucha Muhenan



ORANJESTAD - E “Arubaanse Padvindsters Gilde (APG)” ta contento di anuncia cu awe ta e di segundo aña cu ta celebra e Dia Internacional di Mucha Muhenan.

E dia ta cay ariba 11 di october y a ser anuncia na 2012 door di Nacionnan Uni como e dia di mucha muhe. Esaki a wordo haci pa pone mas atencion ariba “empowerment” y tambe reconoce mundialmente e derechonan humano di e mucha muhe.

Rond mundo guianan mucha muhe bou di encargo di nos madre Organisacion WAGGGS (World Association of Girl Guides and Girl Scouts) ta celebra e dia aki.

E dia Internacional di Mucha Muhenan e aña aki ta hiba como tema “Poniendo un mucha muhe den liderazgo”. Esaki ta pa inspira mundo completo y pa stimula mucha muhenan pa tuma e liderazgo den diferente proyectonan den nos comunidad.

Liderazgo di mucha muhenan ta e yabi pa un futuro sostenibel y un receta pa un sociedad mas balansa den igualdad. APG kier a invita Aruba completo pa para keto un rato ariba e dia aki. Y pensa como un comunidad, con nos tur por contribui na curasha nos mucha muhenan pa tuma liderazgo den sociedad. Un peticion ta bay pa nos stimula nos hoben mucha muhenan pa

asumi retonan importante den nos comunidad. Asina nos tur hunto por contribui na un desaroyo optimal y positivo di nos mucha muhenan.

Un felicitacion ta bay na tur mucha muhenan ariba nos dushi isla Aruba, specialmente nos mucha muhenan di APG. Semper tin den mente cu “Un mucha muhe contento, ta un mucha muhe bunita y feliz”. □